

समे 18:15 Hrs

Headlines

- मुखमंत्री ओमर अब्दुल्ला होरें अनंतनाग जिले च हाड़ें दी मारें हेठ आए दे इलाकें दा दौरा लाइयै सरबंधत अधिकारिएं गी राहत ते पुर्नबहाली सरबन्धी उपाएं च तेजी आहन्ने दे निर्देश जारी कीते।
- केन्द्री मंत्री डाक्टर जीतेन्द्र सिंह होरें आक्खेआ ऐ जे जम्मू खिते च हाड़ें मगरा पुर्नबहाली आहले कम्में च तेजी आहन्नी गेई ऐ। केई सिड़कें गी परतियै खोली दिता गेआ ऐ ते राहत सरबन्धी कोशशां तेज रफ्तार कन्नै जारी न।
- जम्मू-कश्मीर नै भारत दा पैहला-पैहला लवेंडर मखीर बनाने दी उपलब्धि हासल कीती ऐ जेहदे कन्नै औने आहले समें च सेहत खेतर च बेहतरी दे कन्नो-कन्नी ग्रामीण स्तर पर कम्म-रोजगार दे मौकें च बाददा बी होग।
- जम्मू थमां अध्यापक कुलदीप गुप्ता होरें'गी शिक्षा दे खेतर च उत्कृष्टता लेई नेशनल टीचर्स अवार्ड 2025 कन्नै नवाज़ेआ गेआ ऐ।
- मौसम विभाग नै जम्मू-कश्मीर च हौली बरखा दी पेशगोई कीती ऐ। जम्मू-श्रीनगर राष्ट्री जरनैली सिड़क अजें बी गड़डिएं दी आओजाई लेई बंद ऐ।

<><><><><><>

CM Anantnag

मुखमंत्री उमर अब्दुल्ला होरें हाड़ें दे परैन्त दी स्थिति दा जायजा लैने आस्तै अज्ज अनंतनाग च इक समीक्षा बैठक दी अध्यक्षता कीती। उनें इस मौके अधिकारियें गी राहत कम्में च तेजी

आहनने, जरूरी सेवाएं गी बहाल करने, क्षतिग्रस्त बुनियादी ढांचे दी मरम्मत करने ते कमजोर होए दे दरेयाएं दे कंडे गी मजबूत करने दे निर्देश दिते। उनें प्रभावत लोकें आस्तै रूटी, दोआइयां ते पीने दे पानी दी लोड़चदी सप्लाई यकीनी बनाने दी लोड़ पर बी जोर दिता। एहदे शा पैहले अज्ज मुखमंत्री होरें अनंतनाग जिले दे हाड़ प्रभावत इलाकें दा दौरा कीता ते प्रभावत परोआरें कन्नै गल्लबात कीती। उनें लोकें गी भरोसा दोआया जे सरकार इनें चुनौतिपूर्ण समें च उनेंगी समर्थन देग ते उन्दी मदाद आस्तै हर मुमकन कारवाई करोग।

<><><><><><>

MOS Update

केन्द्रीय मंत्री डाक्टर जितेन्द्र सिंह होरें अज्ज जम्मू प्रांतै च हाड़े थवां प्रभावित इलाके दे बारे च दिल बधाने आहली जानकारी सांझी कीती। उनें दस्सेया जे उधमपुर च 50 प्रतिशत सिड़कें गी ठीक करियै गड़्डियें दी आओ-जाई लेई बहाल करी दिता ऐ ते राष्ट्रीय जरनैली सिड़क, जेकर मौसम ठीक रेया ते औंदे किश दिनें अंदर गै गड़्डियें दी आओ-जाई लेई बहाल होई जाहग। दूर-दरेडे इलाकें जित्थै पानी दी सप्लाई प्रभावत होई दी ऐ उत्थै टैंकरें दी मदद कन्नै पानी पुजाया जा रदा ऐ। तौआई उधमपुर जिले दे लाटी इलाके थमां दंऊ सख्त बमार मरीजें गी ज्हाजै राएं अस्पताल पुजाय गया। इस बारे होर जानकारी देआ रदे न स्हाड़े जिला संवाददाता

कठुआ च प्रधानमंत्री ग्राम सिड़क योजना तैहत बनाई गेदी भेड़-बलोड आहली सिड़क गी 20एं दिने बाद परतियै खोल्ली दिता गया ऐ ते बनी-बसोहली सिड़कें दे बी तौले गै गड़्डियें दी आओ-जाई लेई बहाल होई जाने दी मेद ऐ। किश्तवाड़ जिले दी NH-244 सिड़क बाईपास आहले रस्तेया खुल्ली ऐ ते मेन सिड़कें गी साफ करने दा कम्म जारी ऐ। जिला डोडा दियां प्रमुख सब्भै सिड़कां खुल्लियां न ते प्रभावत ग्राएं गी भारतीय फौज दी मदद कन्नै महत्वपूर्ण मदद पुजाई जा रदी ऐ।

रामबन जिले च 85 प्रतिशत सिङ्कां ब्हाल होई गेदियां न ते बिजली दी सप्लाई पूरी चाल्ली ब्हाल होई गेदी ऐ। राहत ते पुर्नवास दे कम्म बरोबर जारी ऐ तां जे तौले शा तौले इलाके च पैहले आंगर हालात पूरी चाल्ली सामान्य होई जान।

<><><><><><>

Water Supply

भारी बरखें ते हाईं कारण जम्मू शैहरा च प्रभावत पानी दी सप्लाई लगभग 80 प्रतिशत इलाकें च ब्हाल होई चुकी दी ऐ। जम्मू नगर-निगम दा आक्खना ऐ जे पानी साफ करने आहले सारे संयत्र अगले किश दिने च पूरी चाल्ली कम्म करना शुरू करी देगंन। प्रशासन आसेया बाकी रौहन्दे इलाकें च पानी दी सप्लाई ब्हाल करने दे अनथक जतन कीते जा रदे न। जल शक्ति टीम दी जम्मू नगर-निगम दे कमीशनर डाक्टर देवांश यादव होरें मती सराहना कीती ऐ जिनें मती मशकतत कन्नै कम्म करदे होई हाइ प्रभावत ढांचे गी ठीक करियें नियमित सप्लाई ब्हाल कीती ऐ।

<><><><><><>

PM Awas

प्रधानमंत्री आवास योजना मुख्य भरै च केई गरीब परोआरें लेई वरदान साबत होआ करदी ऐ। इस योजना दे तैहत लाभार्थिं गी नमां घर बनोआने, खरीदने जां मजूदा घरै दे विस्तार लेई माली मदाद दिती जंदी ऐ ते एह् मदाद सिद्धे लाभार्थी दे बैंक खाते च मुंतकिल हुं'दी ऐ। इस योजना दा लाह् आर्थिक तौरा पर कमजोर परोआरें, घट्ट औंदन आहले परोआरें ते दरम्याने दर्जे दी औंदन आहले परोआरें गी गै दिता जंदा ऐ।

<><><><><><>

Lavender Honey

राई-बाई सरबंधत नवाचार च इक महत्वपूर्ण गैं पुट्टदे होई CSIR –IIIM आसेया जम्मू-कश्मीर च भारत दा पैहला-पैहला लैवेंडर शहद तयार कीता गया ऐ। एह शहद विज्ञानिक रुप कन्नै एंटी-ऑक्सीडेंट कन्नै भरपूर हुंदा ऐ ते एहदे च सोजश-रोधी गुण हुंदे न, जेहदे करी एह इक कीमती स्वास्थ्यवर्धक बनी जन्दा ऐ। एहदे इलावा एह लौहके करसानें आस्तै मता माली फायदा प्रदान करौग ते कन्नै गैं ग्रामीण नौजवानें ते महिला उद्यमियें गी सशक्त बनांदा ऐ। एह वातावरण दी स्थिरता गी बी बढ़ावा दिंदा ऐ। इस पैहल कन्नै जम्मू-कश्मीर पारम्परिक राई-बाई दे कन्नै विज्ञान गी जोड़ने च सब्भनें शा अगगें ऐ, जेहदे राहें पूरे खेतर च ग्रामीण समृद्धि ते स्थायी विकास दी बत पदरी होग।

<><><><><><>

Teachers Award

जम्मू-कश्मीर आस्तै इक गौरवपूर्ण पल च जम्मू जिले दे सरकारी हायर सैकेंड्री स्कूल जिंद्राह दे अध्यापक कुलदीप गुप्ता होरें गी कल नमीं दिल्ली च प्रतिष्ठित राष्ट्री शिक्षक पुरस्कार -2025 थोआ। बरै 1992 थमां अपनी नमीं सोच आहले शिक्षक आस्तै मशहूर गुप्ता होरें घट्ट लागत आहली पढ़ाई दी तकनीकें-साधन दे इस्तेमाल करने ते राष्ट्री स्तर दी प्रतियोगिताएं आस्तै विद्यार्थियें गी सलाह देने लेई जाने जंदे न। सामुदायिक कम्में च उन्दे जुड़ाव कन्नै ते उन्दे जतन कन्नै स्कूलें च दाखलें बद्धे न, पढ़ाई छोड़ने आहलें दी गिनतरी च कमी आई ऐ। नौजवानें च नशाखोरी दी कबैतु च बी कमी आई ऐ। गुप्ता हुंदी इस उपलब्धी नै उन्दे स्कूल, साथियें ते स्थानी बरादरी दा बी मान बढ़ाया ऐ।

<><><><><><>

Eid Celebrations

पैगम्बर मुहम्मद हुंदी जयंति ईद-ए-मिलाद-उन-नबी अज्ज समूलचे जम्मू-कश्मीर च बड़ी धार्मिक श्रद्धा ते उत्साह कन्नै मनाई जा रदी ऐ। इस मौके पर बक्ख-बक्ख थाहरें पर बशेष नमाज अदा कीती गई। जम्मू खिते दे बक्ख-बक्ख जिलें च जलूसें दा आयोजन कीता गया। श्रद्धालुएं नात शरीफ गी पढ़ेया ते पैगम्बर हुंदे शांति, करुणा ते भाईचारें दे सनेह गी याद कीता। रियासी ते पुंछ शैहरें च समारोह आस्तै बड्डे पैमाने पर कार्यक्रमें दा सरिस्ता कीता गया। धार्मिक नेताएं इन्दे च हिस्सा लैने आहले लोकें गी पैगम्बर हुंदी शिक्षाएं दा पालन करने ते एकता, सदभाव ते मानवता दी सेवा गी बढ़ावा देने आस्तै प्रोत्साहत कीता।



Weather –Traffic

मौसम विभाग नै औंदी 12 सितम्बर तोड़ी जम्मू-कश्मीर दे बक्ख-बक्ख हिस्सें च टावीं-टावीं थाहरें पर बरखा बरने ते गर्ज-चमक दी पेशगोई कीती ऐ ते कन्नै गै इब्बी साफ करी दिता ऐ जे इस अवधि दौरान मौसम च कोई बड़ा बड्डा बदलाव दिक्खने गी नैई लब्बोग। मौसम विभाग नै अज्ज 6 सितम्बर सनै कल 7 सितम्बर ते अतरु 8 सितम्बर गी बी केंई थाहरें पर हौली बरखा बरने दी मेद दस्सी ऐ। उआं जम्मू संभाग दे किश जिलें च इस अवधि दौरान चिरे रातीं जां बड्डलै सवेला दर्मेयानी दर्जे दी बरखा बी बरी सकदी ऐ। एदे इलावा औंदी 9 शा 12 सितम्बर मझाटै प्रदेश दे बक्ख-बक्ख हिस्सें च बरखा जां गर्ज चमक दे आसार न। तौआई मुगल रोड ते श्रीनगर-सोनामर्ग-गुमरी सिड़कें पर छड़ी हौली मोटर-गड्डियें गी गै आओ-जाई दी खुल्ल दिती गेदी ऐ जदके जम्मू - श्रीनगर राष्ट्रीय जरनैली सिड़क अजें बी गड्डियें दी आओ-जाई लेई बंद ऐ। सिड़कें दी मरम्मती ते

इसी परतियै ब्हाल करने दा कम्म बरोबर जारी ऐ ते लोकें गी सलाह दिती गेई ऐ जे ओ हाल दी
घड़ी जरनैली सिड़कें पर सफर नेंई करन।

<><><><><><>